



R E S P O N S E
A
LA SECONDE LETTRE
IMPRIMEE
AVEC
LE PRINCE DE BALSAC
ET
REPLIE DE CALOMNIES
CONTRE
LA ROYNE MERE
DV
ROY TRES-CHRESTIEN.

D. DC. XXXII.

3240524

Case
F

39

.326

1632 mo

THE NEWBERRY
LIBRARY

RESPONSE
A
LA SECONDE LETTRE
QUE
BALSAC
A FAICT IMPRIMER
AVEC
SON PRINCE.



BALSAC, la hayne ne me pouffera
iamais à mesdire de toy, ny l'en-
uie à te dire la verité : mais la
compassion humaine, & la chari-
té Chrestienne me porteront touf-
iours à desirer, que tu sois aussi sage Escriuain
comme tu es agreable. L'amour propre, l'igno-
rance & la flatterie t'ont persuadé, que l'esprit &
le iugement estoient vne mesme chose. On void

A 2 bien

bien que tu es entre les mains de ces mauuais
 conseillers , & que tu n'as point d'autres mini-
 stres de l'estat de ton ame , & de ta reputation,
 que ces trois infideles. Pour escrire en homme,
 & pour les hommes , il faut reiecter le stile que
 les anciens Critiques ont appellé *Meretricius* ,
 que les Sages ont banny des Republiques, com-
 me la cause & l'effect de la corruption de la
 ieunesse : & on doit employer plus de temps &
 d'estude , pour choisir les choses , que les mots
 pour les expliquer. Vn Peintre est plus estimé
 pour le traict que pour le colori. Vne belle fem-
 me peut estre desbauchée, ou puante, ou folle.
 Qui cause mieux que les Courtisanes de Venise,
 qui ont acquis l'intelligence des langues en per-
 dant leur honneur ? Nous auons veu à Paris vne
 miserable vagabonde , qui se disoit fille du feu
 Roy, & d'une Princeesse; elle racontoit des aduan-
 tures imaginaires de si bonne grace, & en si
 beaux termes, qu'ils rauissoient tous ceux qui
 l'escoutoient: elle ne laissoit pas d'estre menteuse,
 pauvre , & insensée. Le Herti des petites mai-
 sons est vn excellent maistre d'escriture, il forme
 fort

fort bien les lettres, mais son discours n'a point de sens. Tu perds tant de temps pour adoucir ton ouurage, & chercher des rencontres curieux, qu'il ne te reste point de loysir pour prendre garde à ce que tu escris; & faisant vn procez verbal sur vne particule, tu faiçts le procez à ta reputation. Tu veux faire dire: Balsac a des belles pensées. mais ces pensées ne sont ny veritez ny raisons; & celuy qui les lit, ne sçauroit deuenir ny plus sage, ny meilleur, ny plus sçauant. Ceux qui se messent de faire des liures, quoy qu'impertinens, ont tous des sectateurs, & disciples. Les tiens sont semblables à ces petits enfans, qui reçoient des empoules d'eau & de fauon; elles paroissent de diuerses couleurs en sortant du tuyau, & ne laissent en la main qui les rompt, en les voulant prendre, qu'un peu de sale humidité. Les premiers hommes qui virent l'arc au Ciel, croyoient que c'estoit vn pont azuré; ils reconnurent apres que ces belles apparences estoient faiçtes & deffaiçtes par le soleil. Les bonnes gens de village qui voyent vne grande quantité & diuersité de marmoufets, que certains Allemans

font passer avec des ressorts cachez , s'imaginent qu'on leur enchante les yeux, iusques à ce qu'ils ont cognu le secret qui leur faict regretter le temps, & l'argent qu'ils ont perdu pour contenter leur curiosité. Il est vray, que tes escrits peuvent piper pour la premiere fois les esprits communs des ieunes gens . On void en l'Alchimie les rencontres, & passages des metaux qui amusent les souffleurs: & en tes œuvres, selon la diuersité des subiects , on remarque des gentils traicts; mais c'est en vain qu'on attend l'or de la prudence , ou de quelque cognoissance releuée. I'ay pitié de toy, parce que ie sçay bien que tu ne fais rien sans grand trauail; que ta terre sterile ne produict que par endroits, avec vn grand soing; & que tout ce que tu peux faire, est de polir vne periode dans vn iour. Ce qui te rend plus coupable , est que tu employes beaucoup d'heures pour faire de sang froid vne sottise, là où les autres Escriuains de Mr le Cardinal en ont faict dans la chaleur de leur zele vne centaine à la fois. Les femmes de chambre des Dames, qui font vn peu vaines, ont gagné leur iournée, lors qu'elles
ont

ont coiffé leur Maistresse, & ont trauaillé toute la matinée à friser & passer vn cheueu apres l'autre, ou à dresser les parterres & compartimens d'une garcete. Tu adiuſtes & agences avec grand ſoing tes paroles, & tu perds vn iour pour logger vne conionction ou propoſition: & apres tout cela tes libelles ſont des ieunes mignons, qui ont les cheueux mieux faiçts que la teſte, la mouſtache mieux trouſſée que les raiſons, & les poils de la barbe mieux rangez & ferrez que les actions. Voyons nous rien de mieux tiré & avec plus de proportion que les toiles d'aragne? ce n'eſt que l'ouurage d'une ſale beſtion, qui le faiçt pour prendre des mouches. Je ne te feray point de tort, ny à tes admirateurs, lors que ie te compareray avec eux à des petites beſtes; & que diray qu'un liure remply de ce que vous appelez *belles penſées*, eſt vn iardin tout couuert de pauots tres-beaux & tres-bijarres en leurs couleurs, mais qui ſont tous puants. C'eſt vn grand dommage d'auoir gaſté tant d'or pour faire des idoles, d'auoir peint avec tant d'artifice vn verre fragile, d'auoir adiouſté

vn

vn riche ornement à vne terre cuitte, d'auoir paré & fardé vne more; bref, d'auoir perdu tant de bonnes paroles, pour faire vn si mauuais discours.

Nous attendions la naissance de ce Prince, que Balsac vouloit faire croire deuoit estre autant agreable comme seroit vn Dauphin. Il y a long temps qu'on nous faiët attendre la fin de ce trauail: on disoit qu'il seroit la derniere piece de l'embelissement du monde, & la mort de tous les liures, excepté de la Bible que Balsac faisoit semblant de vouloir respecter. Cet enfant a esté autant de temps dans le ventre de sa mere, que celuy de la ville de Sens qui se petrifia, & qu'on tira avec estonnement, apres la mort de cette pauure femme qui le porta dix ans; comme Balsac a faiët le sien, qui a faiët mourir celuy qui luy a donné la vie, lors qu'il a tué son honneur. Nous auons veu vne piece, qui deuoit estre tres-releuée & tres-serieuse, commencer par vne basse & ridicule inuention de Roman, par les descriptions des peupliers & des grenouilles des riuages de la Charante, & par le bon-
net

net bleu d'un Flamand qui est le premier personnage de ta comédie, & qui nous fait voir, que l'auteur n'est pas seulement extrauagant dans l'élection des choses qu'il dict, mais encore des acteurs qu'il fait monter sur son theatre. J'ay esté scandalisé en voyant ces impertinences logées apres le pourtrait d'un grand Roy : & n'eust esté que l'aduertissement au lecteur m'auoit instruit du dessein de l'ouurier, j'eusse creu en lisant à l'entrée l'exacte description des saisons de l'année, que le Prince de Balsac deuoit estre le soleil qui les fait.

Après auoir examiné l'ouurage tout entier, j'ay dict en moy mesme : Est il bien sorti de l'invention, & parti de la main de ce Roy d'elegance François, de cet excellent raffineur de paroles, de ce refuseur melancholique qui est si passé apres auoir bruslé son sang en choisissant un mot, en polissant vne phrase, & donnant la quarrure & cadance à vne periode ; qui n'escrit rien pour regler nos mœurs, & instruire nos esprits, mais pour nous faire dire qu'il a bien escrit ? Falloit il se bannir du monde, & chercher les solitudes

B

pour

pour rentrer dans la Cour , en conduisant cet Orsat tant leché, & emmuselé d'or , & portant entre ses bras ce petit More emmailloté de broderie? Sans faute ce Roy des Escriuains du temps n'est que leur Roy d'armes : son sceptre n'est que de bois doré , & sa cotte ne passe pas son genoüil. Ce Monarque qu'il veut descrire, n'est pas ce grand Roy LOVYs XIII. incomparable en pieté, bonté, prudence, courage & iustice. Balsac a emprunté son nom, comme font les sargents de peur d'estre battus . A Dieu ne plaise , que nostre Roy soit tel que ce mauuais Peintre pour le naturel, nous le depeint. Nous ne voyons, dans le pourtraict qu'il nous presente, aucun traict ny de son ame , ny de ses vertus : & comme nous n'aduoüerons point, que le Prince de Balsac aye esté tiré sur l'original du Roy, nous serions tres-marris que sa Maiesté fust formée sur le modele de cet ouurier, qui nous a voulu faire vn Roy à la mode du Cardinal de Richelieu. Il est certain que tu luy as demandé le patron, sur lequel il voudroit que son Maistre se reglast : & c'est luy qui t'a faict escrire, *que le Prince*

Prince parfaict (cōme ce bon Seigneur le desire) Pag. 200.
201.
 doit garder cette maxime : Sur vn simple soupçon,
 sur vne legere defiance, sur vn songe qu'aura faict
 le Prince, pourquoy ne luy sera il pas permis de
 s'asseurer de ses subiects factieux, & de se soulager
 l'esprit en leur donnant pour peine leur propre repos?
 Voila vne leçon pour vn tyran : voila ce que le
 Cardinal pratique, & que le Roy n'entend pas.
 On inuente des crimes, pour le porter à consen-
 tir à l'emprisonnement ou exil de quelqu'un,
 duquel le Cardinal a eu vn leger soupçon; ou qui
 a esté si malheureux, que son espece s'est presen-
 tée horrible à son imagination dans vn de ces
 espouuentables songes qui luy sont assez ordi-
 naires. Sur ces apprehensions, ou malicieuses
 ou foles, on oste la liberté à ceux qui pourris-
 sent dans les prisons, qui laissent des familles
 desolées, qui sont deshonnorez comme crimi-
 nels, & qui voyent leurs biens emportez, diuisez,
 dissipez; estans comme le duc attachez avec des
 longes sur vne perche, il n'y a pas vn oyseau qui
 ne leur arrache vne plume. Après auoir faict
 les songes regles de la Iustice, & maistres de la vie

& reputation des hommes, tu adioustes vne doctrine plus estrange : *Ne vaut il pas mieux empêcher les innocens de faillir, que d'estre reduict à cette triste nécessité de condamner les coupables ?* Par cette regle il faut tuer les enfans, pour empêcher qu'ils ne deuiennent pecheurs: & n'y ayant point d'homme de bien qui ne puisse faire vne faute, & la fidelité duquel ne courre le hazard d'estre legerement suspecte, parce qu'il est homme, c'est à dire changeant, ou qui ne soit subiect à vn mauuais office, ou a se rencontrer par malheur dans le songe du Prince, qui sera celuy qui pourra estre en sureté? Tu feras le Souuerain non seulement iniuste, mais insensé, & le reduiras à se faire la barbe avec vn tison, ou à tirer l'eschele apres qu'il sera monté en sa chambre. Estudie toy à bien dire, prepare des apologies, donne la peine à tes compagnons de soustenir ton party; tu ne feras iamais receuoir ces opinions pour Chrestiennes ny humaines par vn Roy Tres-chrestien, ny par le Prince d'une nation qui a tousiours esté, & qui veut estre conduicte par la douceur.

De

De mesme & plus dangereuse consequence
 est ce que tu dicts; *que les Princes peuuent preuenir* Pag. 200.
le danger de leur vie par la mort de ceux qui leur & 201.
sont suspects. tu adioustes, *que c'est vne excusable*
seuerité, & vn effect de la prudence, qui penetre
dans les pensées & secrets des hommes. Par cette
 doctrine tu approuues les massacres, qu'il sem-
 ble que tu detestes en vn autre endroict; ayant
 trouué à redire à ce qui arriua sous Charles I X.
 qui deuroit estre iuste, si ton sentiment estoit
 vne loy. Mais comment se peut il accorder a-
 uec ce que tu as escrit en la page 97. où apres
 auoir reiecté la nouvelle Theologie, tu dicts
qu'on laisse crier la vieille dans les escholes, & dans Pag. 97.
les chaires des Predicateurs, où elle enseigne qu'un
petit mal est defendu, quand il en deuroit naistre
vn grand bien. Que si le monde ne se peut conser-
 uer que par vn peché, elle est d'aduis qu'on le laisse
 perdre. Il me semble que ce discours Chrestien,
 tiré de S. Paul, deuroit retenir celuy que tu as Rom. 3.
 faict apres; qu'un songe creux peut faire empri-
 sonner l'innocence, & vn petit soupçon tuer vn
 ou plusieurs hommes pour le salut du Prince, ou

du public. On les peut conseruer par des voyes plus seures & plus sainctes que celles là. Les Souuerains ont la Iustice contre les indices des attentats, ou rebellions : il ne leur est pas loisible de faire massacrer personne, s'il ne resiste à la iuste puissance, ny d'emprisonner pour vn songe: autrement nous deuons prier Dieu, comme faisoient les Indiens dans Philostrate, qu'il enuoye des bons songes à nos Roys, ou desirer qu'il ne nous cognoissent pas, de peur de nous rencontrer dans les phantomes de leur sommeil, ou dans les resueries de leurs maladies.

Pag. 117 Tu iugeras, si le Roy suiuant tes preceptes peut garder cette pureté de conscience, que tu loges à vn si haut point de perfection, que tu as osé dire, sans reuelation, *qu'humainement parlant, & dans la rigueur de nostre iustice, s'il ne se calomnie soy mesme en la confession, il ne peut s'accuser de mal faire: qu'il a conserué pure & entiere l'innocence iusques icy qu'il a receu de son Baptisme: mais en effect il se laue bien souuent pour se rafraichir, non pas pour se nettoyer; & prend des remedes pour se confirmer en santé, non pas pour se guarir.* Tu ne
sçais

ſçais donc pas , que ſi c'eſt vn ſacrilege de taire
 avec malice ſon peché, c'eſt vn crime de ſ'accu-
 ſer de celuy qu'on n'a pas faiât . Sa Maieſté
 n'ayant iamais offencé Dieu, n'a iamais eu l'ab-
 ſolution, ſi elle ne ſ'eſt chargée de ce qu'elle n'a
 point commis. *Le iuſte tombe ſept fois le iour, & ſe releue.* Prou. 24
 L'innocence telle que tu la deſcris, n'eſt
 que dans la foibleſſe des années ou de l'eſprit :
 l'infirmité de la nature produiât ces deux là ; la
 grace en a donné vne plus releuée à la S. Vierge,
 à S. Iean Baptiſte, & aux Apoſtres, apres qu'ils eu-
 rent receu le S. Eſprit. Tu fais du Sacrement de
 Penitence vn bain delicieux de Deſpos, ou de Pre-
 contat, non du Sang du Fils de Dieu qui nous eſt
 neceſſaire, parce que *tous ont peché, & ont beſoin de ſa gloire,* Rom. 3.
 qui paroïſt en la miſericorde qu'il exer-
 ce en nous pardonnant. Nous le loüions & be-
 niſſons , de ce qu'il a faiât vn rare preſent d'une
 bonne ame à noſtre Roy, & qu'il l'aſſiſte de beau-
 coup de benediâtions pour l'empêcher de l'of-
 fencer ; & iugeons, par ton diſcours, que le Roy
 eſtant innocent iuſques au point que tu le repre-
 ſentes, tu confirmes ce que nous auons touſiours
 creu,

creu, que sa Maieſté n'a iamais ſceu l'emprison-
 nement de la Royne ſa bonne Mere, qui ne l'a
 point offencé ny ſon Eſtat: qu'il ignore qu'elle
 ſoit priuée de ſes biens, ſans forme de Juſtice, ſans
 faiſie, ny condemnation; qu'on aye faiſt ſon in-
 uentaire deuant ſa mort, qu'on luy reſuſe les ali-
 mens, qu'on l'aye calomniée par des libelles dif-
 famatoires: qu'on aye donné vn priuilege à tes
 eſcrits, qui rendent ſa naiſſance infame, & pu-
 blient des impoſtures, qui font criminels ceux
 qui les liront avec autre eſprit que d'execration.
 Il faut aduoüer, pour conſeruer la vertu & repu-
 tation du Roy, & mettre ſa Maieſté hors de la
 neceſſité de ſe confeſſer, que le Cardinal employe
 autant d'eſtude à cacher au Roy ce qui ce paſſe
 dans les deſplaiſirs de la Royne ſa Mere, & miſe-
 re de ſon pauvre peuple, comme tu prens de pei-
 ne pour adoucir tes paroles, & à inuenter des hy-
 perboles impies & extrauagantes. Je ne m'eſ-
 tonne plus de ta mauuiſe conduicte, ayant re-
 cognu que ton deſſein n'a eſté que de plaire à ce-
 luy duquel tu as attendu ta principale recom-
 penſe; & qui pour t'obliger à dreſſer vn Prince
 ſelon

selon sa phantasie t'a recommandé quatre choses. La premiere, de tascher de faire passer pour regles de Iustice, les maximes de sa cruauté & de son inquisition d'Estat ; qui luy ouurent le chemin à l'vsurpation, ou dissipation qu'il veut faire. La seconde, de corner la guerre contre les Espagnols & les Italiens , de monstrier leur impuissance , d'inuiter tous les Princes & Republiques à la ruine de la Maison d'Austriche : ce qui sert de pretexte à celuy qui veut affoiblir le Royaume dans les efforts des conquestes estrangeres , pour auoir meilleur marché de celle de la France. En troisieme lieu il a voulu estre loüé par ta belle desbauchée, qui courra l'esguillette par tout le monde, & sera trouuée belle par tous ceux qui estimeront son visage par son fard , & son corps par son habit. Comme tu ne manqueras pas d'approbateurs (parce qu'il y a assez de personnes qui iugent des choses par les paroles) tu en trouueras aussi apres le Pere Goulou & le Pere André qui feront voir ton ignorance , tes larcins plagiaires, ta presumption ; & sur tout ton impieté, qui t'a faict prendre party avec Machia-

C

uel,

uel, qui est le seul auteur que tu as choisi pour ton Maistre, ayant traicté d'escholiers tous les autres.

En quatriesme lieu, pour contenter ce grand Cardinal, & cet excellent Ministre (qui seroit Pape des Ministres pretendus reformez, si ces malotrus n'auoient reiecté la Hierarchie) il a fallu blasmer la Royne Mere du Roy, & attacher à la fin de ton ouurage vne queue de scorpion, ou donner au dessert le poison qui est dans ta seconde lettre. Celuy qui t'employe, ayant par vn iuste iugement de Dieu perdu le reste de son esprit, avec la recognoissance, & la conscience, a tousiours son peché deuant les yeux; non pas pour s'en repentir comme Dauid, mais pour
 1. Reg. 16 entrer en furie comme Saul. Ta harpe le charme & appaise en quelque façon la melancholie de ce forcené, lors qu'apres luy auoir chanté des loüanges puantes, tu te iettes tout à coup sur l'inectiue horrible contre la Royne Mere de ce grand Prince, que tu as exalté au mesme temps que tu as abaissé sa naissance, & que tu as mesdict de tous les Princes anciens & nouueaux, nostres
 &

& estrangers, pour le mettre par dessus leurs testes, que tu estimes foles ou vicieuses; comme si nostre Roy ne pouuoit estre tenu pour sage & vertueux, si toutes les nations, & mesmes la nostre, n'en auoient eu, & n'en auoient encore, que des insensez & meschans. Tu as eu tant d'apprehension, que la gloire du feu Roy HENRY le Grand ne fist tort à celle de son Fils, que tu as fait difficulté del'estimer, & ie ne sçay si tu le prendras pour vn de ces deux Roys moins imparfaicts, & aucunement passables, que tu trouues dans nos trois Races. Mais c'est sans doute que son malheur a porté, qu'il n'a point eu de Cardinal de Richelieu pour Conseiller, ny de Balsac pour Escruiuin. Ce que ie trouue de plus estrange rencontre, est, que ce Prince clement & genereux nous ayant esté osté par vn execrable parricide, de la mesme ville, qui a porté ce monstre, en soit forté vn autre pour assassiner la reputation de sa Vefue.

Pour te monstrier que tu as perdu la memoire avec la probité, ie te prieray de te souuenir, que dans ton Prince, apres auoir blasmé la supersti-

tion des Espagnols, *qui croient* (comme tu dicts) *certaines propheties qui leur promettent l'Empire du monde*, tu reiectes toutes les predictions pour en faire valoir vne d'un saint homme, qui est le premier de ton kalendrier; c'est Nicole Machiavel, par lequel tu fais predire à Laurens de Medicis Duc d'Vrbain, *que la miserable Jtalie esperoit de sa maison quelqu'un qui la deliurast*. Tu dicts, *qu'infailiblement l'esprit de Dieu, qui luy dictoit ces paroles, voyoit de loing le Mariage de HENRY le Grand, & entendoit parler de LOVYs le Juste*. Passe pour l'application, sans nous arrester à examiner si la Royne Mere du Roy est descēduē de ce Duc, & marquer ton ignorance, ou si l'esprit de Dieu estoit familier à un impie. Je pourrois dire, que si tu prens cette caiollee pour un oracle, tu dois grandement estimer la Princeesse, qui a porté & conserué le Roy qui doit accomplir la prophetie. Il est vray, que les actions que sa Maieſté a desia faict, son courage & sa puissance nous donnent plus de subiect de bien esperer de ses desseins, que la lettre de Messer Nicolo, l'interpretation de Balsac, & la conduicte du Cardinal:

mais

mais si tu iuges, que ce bonheur vient au Roy du costé de la Royne sa Mere, pourquoy en mesme temps que tu trouues cette benediction dans la naissance du Roy, la veux tu rendre vile & abiecte, pour plaire à celuy qui ne croid pas estre grand ny assésuré, si la Royne Mere du Roy est recognuë pour estre sage & vertueuse? Pourquoy dicts tu au Cardinal: *Vous endurez pour la Justice; & vostre cause est celle du Roy & de l'Estat?* De grace monstre nous, ce qu'endure celuy qui faict souffrir non seulement la France, mais toute la Chrestienté, si ce n'est le contre-coup de sa malice, ou qu'on le charge de plus de bien qu'il n'en peut porter. Tu veux faire croire, que la Royne Mere du Roy faict le mal qu'elle reçoit, & que Monsieur persecute en se retirant. Ou est le subiect du martyre pour la Iustice; duquel tu faicts si bon marché, lors que tu dicts, *que le Roy en chassant les Anglois a autant* Pag. 106 *merité que les martyrs.* C'est vne faillie de folie qui approche de l'impieté, apres que l'Euangile a dict, *que la plus grande charité est de perdre la* Ioan. 15. *vie pour la querele & l'amour de Dieu.* Si la

cause du Cardinal est celle du Roy & de l'Estat; il faut que celle de la Royne Mere du Roy, que tu tiens pour estre contraire, ne le soit pas. Il me semble pourtant que le Cardinal n'a pas sauué le Roy, & la France, durant la minorité; & que sa Maiesté peut trouuer d'aussi fortes affections & sages conseils en sa Mere, qu'en son seruiteur. Tu le veux rendre plus necessaire à la France que Dieu & le Roy, & prouuer que la Toute-puissance n'en peut faire vn semblable; & que la sagesse apres trente ans d'aage ne se peut passer d'un Conseiller, ou en dresser vn à sa phantasie, ou discerner vn bon aduis d'auec vn mauuais: c'est bien accourcir le bras de Dieu, & l'esprit du Roy.

Tu poursuis: *Si vous auez de la douleur de n'estre point agreable à vne grande Princesse, pour le moins vous n'auetz point de remords de luy auoir esté infidele.* Le Cardinal n'a point de douleur, parce qu'il n'a point de sentiment: il a encore moins de remords (comme tu dicts) parce qu'il a perdu la conscience; & est tellement endurcy, que c'est vne folie de le picquer.

Tu

Tu asseures, que *la prise de la Rochelle, & le secours de Casal*, plus chantez à la loüange du Cardinal que du Roy, *sont les seuls crimes qui l'ont rendu coupable; & que l'eclat de ce qu'il a faict au dehors, n'ayant peu estre supporté à la Cour, les estrangers sont venus se mesler dans cette ialousie domestique, & essayer de perdre celuy qu'ils ne pouuoient pas gagner.* Nous te voudrions prier de t'expliquer sur cette ialousie domestique. Est tu si fol de croire que la Royne Mere du Roy aye esté enuieuse de la gloire de son Enfant, ou de l'honneur qu'a peu acquerir en le seruant celuy qu'elle luy a donné, & duquel elle auoit respondu iusques à ce que la vanité l'a changé, & que l'auarice l'a corrompu? Les conseils de la Royne Mere du Roy, & ses soings, sont entre les causes principales de la prise de la Rochelle: le Cardinal sçait qu'elle y a plus contribué à Paris, que luy n'a faict dans le camp: elle agissoit & dedans & dehors, pour aduancer tout ce qui pouuoit ayder, & pour destourner tout ce qui auroit troublé ceste entreprise. Apres le Roy elle y a la meilleure part, outre celle qu'elle prend
comme

comme tres-bonne Mere dans les triumphes de son Enfant, n'ayant plus de Mary qui luy aporte des lauriers, & des palmes. Il est vray, qu'elle est faschée que le Cardinal les arrache au Fils & à la Mere; ne laissant au Roy dans tes escrits & dans ceux de tes compagnōs, que ce qu'il mesprise; & reiettant sur la Royne toute l'infamie des fautes qu'il a faict. Il ne manquera pas de dire qu'elle seule arreste le cours des victoires & prosperitez de sa Maiesté; qu'elle a empesché la conqueste d'Allemagne, & a ravi au Roy la Couronne Imperiale. Voila les artifices avec lesquels le Cardinal pense couvrir son ambition, qui a esmeu plus d'affaires que sa foiblesse n'en peut conduire; & qui a l'esprit semblable à ces foyes, qui font beaucoup plus de sang que la chaleur naturele n'en peut regir.

Voicy vne autre faillie de ton esprit: *La credulité de la meilleure Royne du monde a seruy d'instrument à la malice de nos ennemis; & la priere qu'elle fit au Roy de vous esloigner de ses affaires, ne fut pas tant un effect de son indignation contre vous, que le premier coup de la coniuration qui s'estoit formée*

mée contre la France; & qu'on luy avoit deguisée sous un voile de devotion, afin qu'elle creust meriter en vous ruinant. Sauf vostre correction, Mr de Balsac, vous avez entacé dans cette periode trois impostures. La premiere est, que la Royne a seruy d'instrument aux ennemis de l'Estat; & que les plaintes, qu'elle fit au Roy contre le Cardinal, furent un effect de conspiration estrangere. La Royne n'a iamaïs eu intelligence avec ceux qui sont mal affectionnez à la France, ny pour tromper le Roy, ny pour estre trompée sous quelque pretexte que ce soit: les vertueuses Meres ne trompent point leurs Enfans, & les Princesses aduises ne se laissent point tromper. La credulité est vn tesmoignage de foiblesse en la femme; & la coniuration de malice en la mere. Il n'est rien entré dans son esprit contre le Cardinal, que par ses yeux: ses actions l'ont destrompée, son insolence l'a portée à parler; la necessité de ses affaires, & les iustes desplaisirs de ses seruiteurs, à luy oster la conduite de sa maison. Le crime qu'on veut imposer à la Royne, est feint par occasion, & vne reccrimination sans preuve. Si le Cardinal

D

l'auoit

l'auoit recognu, il n'y auoit point de respect qui le deust empescher de le declarer, & de satisfaire à son serment; qui ne doit auoir esgard à personne, quand il s'agit du seruice du Roy. Mais il veut faire croire, que celuy trahit l'Estat, qui ne luy laisse point gouuerner son esprit, & sa maison: si on recule ses espions, & qu'on se deliure de sa tyrannie, on deuient aussi tost ennemy du Royaume. Si on n'est plus cette bonne Maistresse, qui donne trop liberalement; on est vne mauuaise Mere, qui veut tout perdre. Si on parle librement de la ruine de la France, on deuient Espagnol; & ceux qui veulent persuader que les Espagnols ne desirent que nostre perte, ont dict que les Espagnols font descouurir nos defauts par la Royne: ce qui s'accorde aussi mal comme d'estre Cardinal, Admiral, & General d'armée.

La seconde menterie que tu as dict en cet endroit, est, *que la Royne pria le Roy d'esloigner le Cardinal*: ce qui est tres-faux, sauf la correction de ceux qui liront cet escrit. La Royne qui merite plus de creance que le Cardinal, a assure qu'elle ne parla iamais au Roy de chasser le Cardinal,

dinal, ny de luy oster la cognoissance de ses affaires: elle luy dist seulement qu'elle ne s'en vouloit point seruir, ny des siens, desquels elle estoit assiegée; mais que s'il plaisoit au Roy de le conseruer pour ses affaires, elle le verroit, comme elle faisoit ses autres Ministres, dans les conseils & ailleurs, si le bien de son seruice le requeroit. Il est vray, que depuis que les violences ont esté faites, & que les perfidies ont esté recognuës, la Royne a parlé & escrit autrement, & a iugé qu'elle ne pouuoit iamais trouuer la seureté qu'elle desire, & le contentement qu'elle merite aupres du Roy, que par l'esloignement de celuy que la Iustice ne peut souffrir dans l'autorité de tout prendre, ny la prudence dans la puissance de tout entreprendre. Ne cognoistre pas le peril apres l'auoir esprouué, seroit estre beste; & ne le fuir pas, seroit estre bois ou pierre. Ne dicts pas *que sous pretexte de pieté la Royne a esté surprise.* Il n'y a point de Princeesse au monde, qui sçache mieux iusques où va la Religion, qui aye vne deuotion plus solide, & qui l'accorde mieux avec l'Estat. Elle sçait tout ce que sa condition &

son sexe luy permettent de sçauoir de la vraye Theologie, & ne se laisse point piper par la fausse, qui ne surprend que les foibles esprits.

Venons à ta fuite: *Le Roy luy a donné là dessus toute la satisfaction qu'elle pouuoit desirer: de vostre part (Monseigneur) vous n'avez rien oublié pour tascher d'adoucir son esprit .* Disons avec plus de verité, que la Roynes se porta courageusement à tout ce que le Roy desira : elle escouta le Cardinal en presence du Confesseur de leurs Maistez; elle receut ses protestations, & luy donna sa parole (qui n'a iamais manqué à personne) qu'elle oublieroit les mauuais offices que le Cardinal luy auoit faict; qu'elle sacrifioit à Dieu, & donnoit au Roy ses ressentimens; qu'elle vouloit croire qu'il n'abuseroit iamais des bonnes graces de son Maistre, pour en tirer occasion de procurer du desplaisir à ceux qu'il estoit obligé d'honorer & seruir. Ces paroles données & receües avec larmes, & suiuiues de mille sermens de fidelité, furent accompagnées dès le lendemain de tres-mauuais effects, qui furent produicts, ou par la legereté, ou par les pernicioeux desseins que le
Car-

Cardinal n'auoit iamais quitté, qui estoient, ou de perdre sa Maistresse, ou d'auoir cet aduantage que tous les siens fussent restablis aupres d'elle, & luy remis dans la Surintendance de sa maison: ce qu'il poursuiuit avec tant d'ardeur, qu'il fit menacer la Royne, qu'on luy osteroit tous les seruiteurs qui luy estoient plus fideles & agreables, si on ne la pouuoit disposer à reprendre ceux que sa prudence & sa iustice auoient faict chasser. Vne grande Princesse de naissance, la Vefue & la Mere des Roys de France, creut qu'elle deuoit tesmoigner plus de courage, qu'un petit Gentilhomme esleué par elle n'auoit de hardiesse: elle se resolut de souffrir plustost les extremités de ses violences, que de porter la honte d'auoir cedé à son insolence. De là, & des paroles genereuses que Monsieur dist au Cardinal, qui a le sentiment trop delicat, sont venus tous les scandales que nous auons veu, & de là sortiront tous les maux qui les suiuront, si Dieu n'y met la main.

Tu as donc grand tort de dire: *Les mauvais esprits qui l'environnoient, empescherent l'effect que nous attendions de vos soubmissions: les diseurs de*

bonne fortune, & les interpretes des songes l'emporterent sur les sages conseillers, & sur les fideles seruiteurs: la Royne se laissa persuader à une science qui n'a iamais faict que tromper les Princes; & quelques vaines predictions furent plustost creües, que ces eternelles veritez, que vous prononciẽz lors qu'elle vous faisoit l'honneur de vous escouter. Voila le plus grand effort de ta medifance: tu crois auoir trouuẽ vn moyen pour faire passer la Royne pour foible d'esprit, & le Cardinal pour sage, en disant qu'elle croid plus facilement des estoilles muetes que des oracles parlans, & des sottises que des raisons; que celles-cy ne pouuant conuaincre le Cardinal, on le faict condamner par les songes, & par les astres. Si nous disions que iamais la Royne n'a veu des prediseurs, le Cardinal nous tiendroit pour des personnes qui nient toutes choses. Nous confessons, que ce grand Admiral, tourmentẽ par cette folie plus qu'homme de la terre, qui faict sa bouffole des diuinations, & sa carte marine des figures des Astrologues iudiciaires, & qui n'entreprend rien sans auoir consultẽ les deuins, à pressẽ quelquefois
la

la Royne d'escouter les premiers : ce qu'elle a
 faict plustost par complaisance , & pour s'en
 mocquer , que pour y adiouster foy : elle les a
 ouys comme ont faict ceux qui cherchent la
 quadrature du cercle, la pierre Philosophale, la
 poudre de proiection, ou le mouuement perpe-
 tuel : elle a tousiours iugé, que de leuer la teste
 pour contempler les astres, sans prendre garde à
 ses pieds, nous peut faire tomber dans la fosse,
 & nous exposer, avec cet ancien Philosophe ,
 à la risée d'une chetive seruante . La croyance
 qu'on donne aux vendeurs d'influences, esteint
 la preuoyance , sans laquelle on rencontre mille
 accidens qu'on pourroit destourner : elle relan-
 tit par vne fotte & oyfiue esperance la vigueur
 des actions genereuses, & leur rompt leur pointe:
 on ne veut pas se tourmenter pour faire reussir
 ce qu'on croid que les planetes feront toutes seu-
 les; ce pendant qu'elles roulent, nous ne bougons
 d'une place; & nous imaginons, que ce que le
 ciel marque ou faict, sera accompli par la pro-
 uidence de Dieu sans causes secondes, ou par la
 force de ce grand corps, qu'on se persuade auoir
 autant

autant de puissance sur les choses libres, comme
 ils en ont sur les naturelles. Cette eschole charla-
 tane qui ne faict que des disciples paresseux, n'a
 iamais esté la maistresse de celle que tu accuses
 faussement. Elle sçait que le ciel est le liure de
 Dieu; mais que les caracteres y vont si viste,
 qu'il est comme impossible de les adiufter avec
 le moment de ce qui est arriué en terre, où les
 horologes ne s'accordent pas bien souuent avec
 le soleil: & le monde n'ayant iamais veu deux
 fois tous les astres en mesme rencontre, qui peut
 parler par experience de ce qui n'a esté qu'une
 fois; & par science, de la nature des corps si grands
 & si esloignez de nous, qui sommes arrestez par
 les difficultez que nous trouuons en la cognois-
 sance d'une petite fourmy qui est deuant nous?
 La Royne Mere du Roy sçait toutes ces choses,
 comme sage Princeesse; & comme Royne Tres-
 chrestienne elle obeit à la loy de Dieu, qui de-
 fend d'adiouster foy aux deuins, que tu appelles
diseurs de bonne fortune: en quoy tu as esté plus
 aduisé que le Cardinal, qui en sa Declaration
 enregistrée par la violence qu'il a faict au Parle-
 ment,

ment, & dans les liures infames de tes cōpagnons, assure que la Roynie n'a pas esté seulemēt foible pour se laisser amuser par des predictions, mais qu'elle a esté meschāte pour en esperer des effects contraires à la conscience, & à la nature. Dieu qui cognoist & sonde les cœurs, sçait que cette imposture fondée sur les lumieres du ciel est plus noire que les tenebres de l'enfer. Celuy qui a faict tout ce qu'il a peu pour en auoir quelque indice, & qui apres les promesses a employé les tortures pour perdre vne bonne Mere dans l'esprit d'un bon Fils, n'a rien trouué que sa cōfusion; & a conuaincu sa malice, en voulant accuser l'innocence.

Pour ces *eternelles veritez*, desquelles tu le fais autheur pour le rendre precepteur de la Roynie, assure toy qu'il n'a iamais faict cette leçon à celle qui l'a reconnu pour seruiteur, non pour pedagogue. Il y a long temps que cette Princesse n'en a plus; & tant s'en faut qu'elle aye apris du Cardinal comme il falloit viure avec le Roy, que c'est luy qui doit à la Roynie les instructions pour sa conduite. Il les a quittées lors que l'ambition l'a corrompu: c'est ce maistre qui luy a chatoüillé les

E

aureil-

2. Tim. 4 aureilles, & l'a diuerty (comme dict S. Paul) *de la verité, pour le ietter dans la vanité.* Tu dicts, que cet excellent directeur des esprits a remōstré à la Royne, *qu'elle ne deuoit regarder que le Roy:* tu sçauras, que le mal qu'elle a receu luy est arriué pour ne l'auoir point voulu perdre de veüe, & pour veiller sur les actions de ceux qui mesnagoient aussi mal ses affaires, ses alliances, & son Royaume, que sa santé, & sa reputation. Tu adioustes pour second precepte du Cardinal, que *la grandeur de l'Estat ne diminuoit point celle de la Royne.* La puissance de la France ne peut estre celle du Roy, qu'elle ne soit à sa Mere, qui a la seconde part au contentement, à la gloire, & à la seureté. Si le Cardinal luy a peu oster la derniere, il ne luy raura jamais les deux autres: elles suiuent la nature, & la vertu, qui sont aussi entieres en Flandres qu'en France; & dans vn triste esloignement la Royne se resioiuit aussi bien des vrays aduantages du Roy, & prie Dieu avec autant d'affection de les luy conseruer & augmenter, comme elle feroit dans le Louure, ou dans le Palais de Luxembourg, où elle doit trouuer, avec les bonnes graces

ces du Roy son Fils, le centre de son repos, & attendre la fin de sa vie. Le troiefme aduis que tu fais sortir du Cardinal, est, *Que les conseils qui viennent d'Espagne, ne sont pas bons pour les affaires de France; & que de laisser faire les Espagnols, n'est pas demeurer en repos, mais se preparer de la peine, & à toute la posterité.* Si le Cardinal eust donné ces instructions à la Royne, & s'il eust tesmoigné qu'il se desfioit de sa fidelité enuers la France, sa temerité meritoit que sa M^{te} le chassast de sa maison; comme elle a faict, lors que son imposture a entrepris de faire passer pour vn crime la bonne intelligence avec l'Espagnol, encore qu'il aye recognu en l'esprit de la Royne, avec le desir de conseruer la paix entre ses Enfans, vne tres-forte inclination pour la grandeur de la France. Elle a tousiours creu que ces deux choses n'estoient point contraires; mais qu'elles seruoient l'une à l'autre. L'ignorance du Cardinal, ou sa malice, a faict semblant de ne le croire pas, pour couvrir le dessein qu'il a d'affoiblir l'Estat, en nous faisant venir aux mains avec l'Empereur & le Roy d'Espagne; qui n'ont rien

entrepris qui nous doiue obliger à vne rupture, & qui l'ont peu faire durant nos guerres ciuiles. Le Cardinal a trouué ta melancholie disposée, ou ton auarice preste pour receuoir avec honneur, sous esperance de profit, la charge de trompette fanfaron, ou plustost de corneur infame de cette guerre: laquelle, selon le sentiment de tous les sages, s'accorde fort mal avec la pauureté, peste, & famine qui affligent le peuple, avec le mauuais traictement qui a esté faict à la Royne Mere, l'e-loignement de Monsieur Frere vnique du Roy, les mescontentemens des Grands & de tous les Officiers, & sur tout avec les actions de celuy qui employe ta plume de paon pour nous amuser par ses belles couleurs, ce pendant qu'il tasche de se rendre maistre du Royaume, ou d'une bonne partie: tu es aposté pour crier au Roy, qu'il doit courir après ceux qu'on accuse faussement de luy auoir coupé la bourse, lors que le Capitaine de la Matte l'emporte, & se sauue: mais ce grand Prince verra bien tost qu'on luy veut donner le change; il te chastira pour tes mauuais escrits, & le Cardinal pour ses estranges finesse.

La

La conclusion des pretendues leçons de ce Docteur politique, ou de Palestine, est: *Les estoil-* Ce Do-
cteur de
Palesti-
ne estoit
vn fol
de Paris.
*les ne luy pouuoient rien apprédre de plus vray ny de
meilleur: & si elle se fust arrestée à ces bons oracles,
nous la verrions encore pleine de gloire & de maiesté
auoir part à toutes les pensées de son Fils, & nous
vous verrions encore receuoir ordinairement de sa
bouche les commandemens de vostre Maistre: mais
elle ne l'a pas voulu.* Tout ce que la Royne Mere
du Roy a attendu de vray & de bon des estoilles,
est la lumiere & l'influence de celle qui illumine
& conduict les Roys, qui leur monstre la de-
meure de la vertu, qui gemit & endure. Nous es-
perons que cet astre s'arrestera là, apres qu'il aura
caché sa clarté à celuy qui persecute l'innocence,
& qui descharge sa rage sur les seruiteurs; le con-
seil de Dieu n'ayant pas voulu permettre qu'elle
aye faict perir les maistres. Et afin que tu ne sois
pas en peine d'interpreter cet Enigme, lors que
tu sçauras que le Cardinal est pire que Herode, tu
ne trouueras point de difficulté à l'explication
du reste. I'adiousteray que le Cardinal estant
vn feu folet, qui ne guide point le Roy, mais le

veut conduire dans vn precipice; ce sale meteore, qui est vne exhalaison que le soleil a esleué de la terre, sera bien tost esteint, & ne laissera qu'une puante fumée.

Tu dictes que la Royne *n'a point voulu escouter les bons oracles du Cardinal, & que cela luy a faict perdre sa gloire, & la part qu'elle auoit à toutes les pensées du Roy*. Tu fais bien d'appeller oracles les paroles d'un Python, qui sont tousiours ambiguës: ce n'est pas un Calchas, mais un Phorbas excellent. Il sçait & pratique mieux la doctrine des equiuoques, & des euasions mentales, que ne font ceux que tu persecutes dans tes escrits.

Eccli. 2. Il est maudit de Dieu, qui a dict, *Malheur à celui qui entre dans la terre par deux trous*. Le Cardinal est semblable au Renard, qui a vne por-

Psal. 11. te derriere à sa taniere: *il parle en cœur & cœur*; c'est vne perdrix de Thrace qui en a deux: & il

Eccli. 37 est, comme disoit le Sage, *abominable deuant Dieu ne discourant iamais qu'en Sophiste*. Ainsi les faux Prophetes trompoient les Roys de Iuda & d'Israel avec leurs responses douteuses: ainsi celles de Delphes estoient à double sens: ainsi nous lisons
dans

dans l'Alcoran, que Mahomet persuadoit qu'il estoit inspiré de Dieu, lors que son Démon & le mal appelé diuin le tourmentoient. Je viens à la suite de tes impertinences.

*Le Roy qui luy accorda autrefois le pardon de plus de quarante mille coupables, n'a peu obtenir d'elle la grace d'un innocent; & celui qui est venu à bout de l'obstination des rebelles, & qui n'a rien attaqué qu'avec succès, a prié sa Mere inutilement. Ce que ie peux repliquer à ce vilain discours, & à ces belles paroles, est, qu'ayant remarqué dans ton livre du Prince, que tu as mis le nez dans celui de Dieu, ou que tu en as ouy parler; i'ay iugé, que si tu l'auois leu tout entier, tu aurois peu apprendre, que S. Paul estimant la grace que Dieu a fait aux pecheurs, a dict par humilité: *Entre lesquels ie suis le premier.** I. Tim. I.

Le Cardinal se doit mettre à la teste de ceux qui ont receu l'abolition du Roy, si elle a esté donnée pour les affaires d'Angers, qui furent œuvres de son inuention & de sa conduite, & dans lesquelles s'il y a eu quelque crime qui aye mérité vn pardon, il le prist avec les autres; & comme

comme le chef il eust cet aduantage, qu'il receust par dessus vne grande recompense, pour monstrier que les pechez, que tu confesses pour luy, ont esté si heureux, que non seulement il en a eu l'absolution, mais la benediction; & que là où les autres ont respendu & perdu le pourpre de leur sang, il a recueilly & gagné celui qui a teinct l'habit qu'il porte. Voila vn des plus beaux traicts de visage de cette Innocence, que tu nous depeints comme pucelle dans le tableau qui nous represente comme vne furie l'opiniaistreté de la Royne, que le Roy n'a sceu vaincre, ny la raison conuaincre, si on croid tes impostures. Mais si on recherche la verité, on trouuera que sa Maiesté, ayant desiré que la Royne sa Mere escoutast le Cardinal, & luy tesmoignast qu'elle vouloit oublier les iustes subiects qu'il auoit donné à ses plaintes; elle a faict tout ce que sa Maiesté a desiré, & le Cardinal n'a rien accomply de ce qu'il auoit promis: il perdit la souuenance en sortant du cabinet de la Royne, & prit à la porte de celui du Roy les artifices desquels il se sert ordinairement, pour iouer ses vieilles pieces, & en inuen-

ter

ter des nouuelles : il changea la honte qu'il auoit eu de sa faute en rage de l'auoir confessée ; & se repentant de sa penitence, il importuna le Roy de presser la Royne sa Mere de reprendre ceux qu'elle auoit faict retirer de son seruice. Sa Maiesté iugea que cette priere estoit fort inciuile, & blasma celuy qui l'auoit faicte. De sorte, que le Cardinal qui nous veut représenter l'ame de la Royne, comme vne place inexpugnable à la raison, & aux prieres de sa Maiesté, a trouué que le Roy auoit résisté aux attaques qu'il a voulu faire contre la Iustice & Bienfiance, iusques à ce que sa Maiesté a esté forcée par toutes les calomnies que l'enfer a enuoyé au secours de la malice, pour luy ayder a ruiner ses deux grandes ennemies, qui sont la Nature & la Vertu.

Tu dicts, que ce n'est pas offencer celle-là de ne pas abandonner cette-cy. Nous ne traictons pas des droicts de la Nature & de la Vertu ; nostre question est du faict: nous sommes asseurez, que le Roy & la Royne sa Mere sont de tres-bon naturel; mais nous ne demeurons pas d'accord que le Cardinal soit vertueux : nous croyons le con-

Ce n'est pas offencer la Nature de ne point abandonner la Vertu : paroles de Balzac.

F

traire

traire de ce que tu soustiens, & disons que l'artifice & le vice l'ont emporté sur la Nature & la Vertu : si ces deux puissances cedent pour quelque temps, en fin elles triomphent de la violence. Le Sang de France peut estre vn peu alteré par la chaleur de la cholere, ou par la froideur de l'auerfion, mais il ne sçauroit estre corrompu : il se remet en son temperament par sa propre force, & il boult contre ceux qui l'ont voulu eschauffer contre soy mesme.

Tu es conuaincu d'insolence & impieté, lors que tu dicts, *que ce n'est pas pecher contre la reuerence maternelle que de ne point violer l'amitié.* Tu traictes avec egalité le Roy & le Cardinal par le mot *d'amitié* : celuy qui a pris le deuant sur les Princes du Sang, s'est desia mis à costé de son Maistre; & dira dans peu de temps, comme le Cardinal d'Yorck, *Moy, & mon Roy.* Tu nous veux persuader, que sa Maiesté a imité nostre Seigneur, lequel parlant de ces Disciples, les appelle *sa mere & ses freres*; ayant dict, *que celuy qui faict sa volonté, est son frere, sa sœur, & sa mere, qu'il a pensé que les Roys ne deuoient pas considerer*
en

Matt. 12

en telle sorte la proximité qu'ils n'ayent esgard à l'affection ; & que pour regner , ils ont veritablement besoin d'alliances & de parens , mais qu'ils ne se peuvent passer de seruiteurs & d'obeissance . Cette application ne peut estre ridicule qu'elle ne soit impie , puis que tout manquement de respect que nous deuons à la parole de Dieu , est vn espece de blaspheme . Le Sauueur du monde parloit de ses Saincts qui n'auoient point d'autre regle que ses commandemens, ny d'autre amour que pour luy ; qui ont honoré parfaictement sa sainte Mere , & qui auoient en leur compagnie les cousins de leur Maistre, qu'ils aymoient grandement . Tu employes cette leçon , pour monstrier que le Roy doit, au preiudice des siens, conseruer vn seruiteur, qui n'a point de visée que celle de son ambition, qui n'a rien à cœur que ses interests ; qui emprisonne la Mere , & chasse le Frere de son Seigneur . Tu dicts , que le Roy se passera plus facilement de ses plus proches , que de seruiteurs & d'obeissance . Monstre nous que les siens ayent esté infideles : as tu prouué contre eux quelque chose qui doiuë faire preferer la

Matt. 10

bienueillance à l'amour ? où sont les pieces sur lesquelles vous pretendez luy faire perdre son procez ? Et puis que vous entreprenez de vous seruir de la parole de Dieu, souffrez que ie vous allegue cette maxime, *que le valet n'est point par dessus le Maistre*. Pour renuerfer cette loy, il faut dire: *Vous voila donc Monseigneur maintenu par la neceſſité de vos ſeruices, & par les intereſts de l'Eſtat; vous voila au deſſus des vents, & de la tempeſte*. Donc le bras de Dieu a eſté accourcy & affoibly depuis qu'il l'eſtendit pour preſenter ce grand Cardinal à la France, & qu'il l'a roidi pour le maintenir: donc cet Archiministre eſt l'Atlas qui porte le ciel, qui nous accableroit s'il auoit retiré ſes eſpaules: donc c'eſt l'ame generale qui nous faiſt viure, l'air que nous respirons, le ſoleil qui nous eſclaire, l'influence qui conſerue l'vniuers, qui retourneroit à ſon chaos ſi Dieu l'auoit retenuë. Si ce Geant de l'Eſtat auoit ſon œil creué, il ne ſeroit qu'une lourde maſſe de chair: ſi cette clef tomboit, toute la voulte iroit en ruine: ſi ce bouclier, qui couure le Roy dans les Theſes que nous
auons

auons veu, estoit fausse, nostre grãd & inuincible Monarque seroit vaincu : & si vn coup de vent emportoit ce Gouuernail, nostre Vaisseau seroit le ioüiet des vagues & des vents ; là où par la conduite de cet admirable Admiral (qui ne fut iamais sur la mer) nous allons à vogue rancade, & celui qui tient le timon , *est au dessus des orages & des tempestes*. Il ioüit donc de la tranquillité de ceux qui sacrifioient sur le sommet du mont Olympe : il est comme les Dieux qui estoient spectateurs sans compassion, & sans crainte des combats qui se faisoient au tour de la ville de Troie. Ce peut il faire que Dieu donne tant de repos à ceux qui troublent son Eglise , qui renuersent les Royaumes , ruinent les peuples, font gemir tant de paysans, pleurer tant de veufues, languir tant de petits enfans , emprisonner tant d'innocens , & bannir tant de malheureux ? Cette Marmotte dort aussi profondement dans ses filets, comme elle faisoit en son giste : ce Samson , qui est dans le sein de la Fortune, n'a point d'apprehension, ny des ciseaux de cette infidele, ny des cordes des ses ennemis : & ce Sisara est sans

remords de conscience qui luy perce les temples, parce que la prosperité l'a assoupi avec la douceur de son lait. Disons plustost, que celuy que tu loges au plus haut du bonheur, ne peut sans vertigo ietter les yeux sur le plan duquel il est monté : il croid sans doute, que tous ceux qui le regardent, le mirent pour l'abbattre ; & il s'imagine que ce qu'il embrasse, bransle, parce que son cœur tremble continuellement au bruiet des fausses & des veritables alarmes. Celuy que tu veux affoir *au dessus des vents*, les marque tous avec la baguette qu'il tient en la main, comme faisoit l'homme qui estoit au plus haut de la tour de Vitruue. Cette statuë touchoit sur le vent, qui estoit à l'opposite de celuy qui souffloit : on doit dire le mesme du Cardinal, qu'il faict tousiours paroistre le contraire de ce qu'il pense ; ce qui n'est pas vne si petite contraincte, qu'on puisse, sans flatterie, estimer tres-heureux celuy qui est en ce miserable estat, plustost suspendu qu'assis, agité qu'arresté, & ne pouuant estre abbatu que par vn seul coup ; cent mille qui le menacēt, luy donnent plus d'apprehension, que ne luy fera de mal celuy qui les finira

finira toutes; pour commencer sa punition, s'il ne se conuertit.

Après cela dicts tant que tu voudras : *Les plaintes qu'on a faict contre vous, n'ont faict qu'asseurer vostre Maistre, que vous estiez plus à luy qu'on ne desiroit.* Tu as grand tort de blasmer la Royne, d'auoir quelque regret de ce que le Cardinal sert le Roy (comme tu crois) avec affection & fidelité. N'est ce pas cette bonne Princesse qui l'a donné à sa Maiesté, avec intention qu'il la seruiſt comme il a deu faire? n'est ce pas elle qui a surmonté l'auersion du Roy? n'est ce pas elle qui a gagné ceux qui s'opposoient à son entrée dans les conseils estroits? n'est ce pas elle qui en a respondu? qui est la caution qui soit marrie quand on la descharge, & qui se fasche lors que le principal debiteur paye? qui est la personne si folle qu'elle se reioüisse, après auoir présenté vn valet, lors qu'on luy reproche qu'il a ietté dans vne maison vn espion, vn traistre, ou vn larron? crois tu pouuoir persuader que la Royne seroit affligée, si elle voyoit son Roy, qui est son Enfant, fort content du seruiteur qu'il a receu de sa main?

Ce

Ce qui vient en fuitte , est encore plus extravagant : *Je ne doute point que vous ne pleuriez l'infortune d'une Maistresse, que vous aviez conduite par vos services au dernier degré de la felicité.* Nous auons sceu ce que l'insolence a faict dire au Cardinal, & nous auons veu ce que la violence luy a faict faire. Pour ses larmes, si la ferechessede son cerueau en a versé, nous sommes asseurez, que la rage de n'auoir point acheué les maux qu'il a fort aduancé, les tire plustost que le desplaisir de les auoir commencez. Il ne peut deplorer comme *infortune* ce que son dessein a produit : on n'appelle pas malheur l'affliction qu'on procure: ce qu'on nomme accident, vient d'une cause qui n'a point de conseil. Tu voudrois persuader, que les embuscades des voleurs & le coups de foudre viennēt d'un mesme principe. Personne ne peut croire, qu'une pierre qui assomme quelqu'un, estant abbatuë par un vent impetueux, soit un rencontre semblable à l'arquebuzade d'un ennemi qui tuë par une fenestre. Le Cardinal n'a iamais serui d'Escuier à la Royne, pour la conduire au palais de *Felicité*; mais il y est

y est allé à la suite de sa Maistresse. Tu es mauvais Philosophe, lors que tu prens l'effect pour la cause; & tu es insensé, lors que tu t'imagines qu'une Princeesse grande par son extraction, par son Mariage, par la naissance du Roy, par ses autres Enfans, par les alliances qu'elle a fait, & sur tout par sa conduite & sa vertu, n'aye peu estre heureuse que par le moyen d'un homme qu'elle a tiré de la misere. L'oubliance de la condition en laquelle on l'a trouué, & des bienfaits qu'il a receu, luy a donné tant de presumption qu'il croid auoir en main la baguette de Moyse, avec laquelle il chasse les tenebres & ramene le iour; ou la houffine de Mercure, qui iette les ombres dans les tenebres des enfers, & les fait sortir pour reuoir la lumiere du ciel: ou qu'il a trouué l'anneau de Gigès, avec lequel il rend visibles & inuisibles ceux auxquels il le preste: ou qu'il enuelope & desuelope les personnes, comme faisoit Venus son Enée. Ainsi ou ce saint Prophete, ou ce faux Dieu, ou ce Roy fabuleux, ou cet esprit de desbauchée, donne & oste la felicité, quand bon luy semble: est Maistre de la fortune, & de

l'infortune: a apporté celle-là quand il a voulu à la Royne, & la rauie quand elle l'a fasché. En fin, Balsac qui a entrepris de renuerfer toutes les creances anciennes, & qui nous veut descouurir dans ses escrits vn monde nouveau, s'est imaginé qu'il auoit assez d'eloquence, pour nous persuader que ce n'est pas la Royne Mere du Roy qui a aduancé le Cardinal, mais que c'est le Cardinal qui a aduancé la Royne Mere du Roy.

Tu dicts vne chose, sur laquelle tu pourras estre desaduoié: *Je m'assure que vous voudriez estre mort à la Rochelle, puis que iusques là vous auez vescu dans la bienueillance de la Royne.* Le Cardinal ne faiët pas si bon marché de sa vie, & ne l'estime pas si peu de chose (la faisant si bien garder comme il faiët) qu'il la voulust perdre par complaisance. Par ta foy, crois tu que cet homme, qui est pressé de sept ou huiët Capitaines, Lieutenans, Enseignes, & Exempts, qui ont des pistolets dans les poches, & des dagues dans les chausses, qui porte vne cotte de maille, qui craint comme vn tyran, & qui n'espere pas beaucoup en Dieu, estant assez mauuais Chrestien,

vou-

voulust perdre cette vie delicieuse & orgueilleuse pour cette pauvre & miserable Maistresse, à laquelle il l'a vouldroit offer s'il pouuoit ? Mais penses tu que la bienueillance de cette Princesse aye abandonné le Cardinal apres la prise de la Rochelle ? Personne ne porte enuie à vn bien qu'elle a desiré & aduancé, comme a faict la Royne Mere la reddition de cette place : outre cela elle recognoist que le Cardinal ne l'a point forcée ; c'est le courage & la conduite du Roy, avec la puissance de son Estat, qui l'ont contrainte de se rendre . De sorte, que si la Royne enuioit cette gloire au Cardinal, elle fonderoit son enuie sur vn bien, auquel elle a plus de part que luy ; ce qui seroit vn grand tesmoignage de folie : son Eminence ayant assez faict de mal recognu, & faisant paroistre assez d'esclat, qui donneroient iuste subiect à la ialousie, si on en vouloit auoir contre luy.

Tu as voulu finir par l'esperance que tu donnes au Maistre de ta plume, en disant, *que Dieu dissipera vn iour ces nuages, & enuoyera à la Royne des plus equitables pensées de la fidelité du Cardinal.*

Nous attédons que le ciel face fondre les broüillars qui couurent la France, & que le Soleil de Verité & de Iustice escarte les tenebres du menfonge & de la violence; mais ce beau iour ne doit pas estre desiré par le Cardinal, s'il ne le veut employer pour pleurer les fautes que cette Lumiere luy fera voir, pourueu qu'il veille ouurir les yeux.

Tu as tort de dire, que *les pensées de la Royne seront plus equitables*: comme si elles auoient esté ou pouuoient estre iniustes. On ne la peut accuser que d'auoir eu trop de bonté, qui a prouqué les iniures d'un ingrat, lors qu'elle deuoit esmouuoir sa recognoissance. Si le Cardinal auoit souffert quelque iniustice, on diroit que Dieu le punit pour celles qu'il a faict: mais iusques à present il a esté plustost en possession d'en faire, qu'en estat d'en receuoir. Il ne sera pas aussi l'obiet de la vengeance de celle qui n'en veut point prendre sur sa personne, qu'elle a mis à couuert sous le pourpre de l'Eglise; ny sur ses biens, parce que la Royne ne destruiet pas ses ouurages, & ne demande pas ce qu'elle a donné. Il est vray, qu'elle seroit bien aise que ces auantages

ges que le Cardinal a ioinct, avec celuy de l'autorité qu'il a pris, n'eussent pas la puissance de continuer les desordres; qui sont venus si auant, que si on ne les arreste bien tost, il n'y aura que le miracle, qui tente Dieu, qui nous en puisse tirer. Le Ciel reserve au Roy cette gloire de les auoir faict cesser: il sera vrayement LOVYS LE IUSTE, lors qu'il aura faict iustice à l'Eglise de Dieu & à la Royne, qui sont deux Meres, desquelles il est le premier Fils.

Ta conclusion est merueilleuse, & n'a pas besoin d'un grand examen pour faire voir la legereté de ton cerueau; qui en se loüant, se condamne; & en s'excusant, s'accuse. Voicy tes paroles: *Je sçay bien que ie suis bon François, & que j'ayme extremement mon Pays; mais ie ne sçay pas si ie suis bon Politique, ny si ie cognois assez nos affaires: sans doute j'ay plus de courage que de force, & plus de zele que de science.* Balsac s'imagine, que le Cardinal & luy sont les deux meilleurs François du Royaume, parce que l'un pretend au Royaume des peuples François, & l'autre à l'Empire des Escriptuains François: mais ie ne cognois pas

deux plus mauuais Gaulois, que ceux qui irritent, l'un par ses actions, & l'autre par ses escrits, les estrangers & les citoyens pour les porter à vne guerre ouuerte, & à vn souflement. Ils croient obliger leur Pays en y mettant le feu, pourueu que la clarté qu'il produira face esclater la gloire de ceux qui l'ont allumé, & qui pensent en acquerir en l'esteignant. On iugera de là, si c'est *par amour* que le Cardinal veut embrasser la France par les deux bras de mer; si c'est aussi par amour que Balsac flatte ses playes, au lieu d'aduertir qu'il est temps de se mettre en estat de les guarir, deuant que la gangrene oblige au retranchement des membres qui sont desia noirs & enflez.

Mais n'est il pas plaissant, lors qu'il dict; *Je ne sçay pas si ie suis bon Politique*, luy qui entreprend de traicter du Prince, qui est le chef, l'ame, & la loy viuante de la Police? Il a subiect de se desfier de sa science, puis que sans cholere ny enuie nous pouuons dire, que iamais hōme n'a plus malicieusement ny plus legerement traicté cette matiere. Ton liure commence par vne entrée de ballet,

let, & finit par vne retraicte de furie, n'estant rien qu'un amas de pieces mal attachées, un cento grossierement coufu; dans lequel nous remarquons, que tout ce que tu as sceu & ouy dire de diuerses choses, & que tu as composé sans fuitte & par lambeaux, a esté lourdement adiufté: encore que le stile soit assez coulant, il n'y a rien de plus forcé ny de plus interrompu par digressions que ton ordre: on ne remarque aucune definition ny diuision des vertus necessaires à un Souuerain, mais un perpetuel mespris de tous les Auteurs anciens, & de tous les Monarques, avec un tesmoignage de presumption insupportable: de sorte, que ie peux asseurer, qu'hors du pourtraict, du nom & des loüanges du Roy, qui pouoit & deuoit estre plus iudicieusement estimé, si on auoit retiré ces trois choses dignes d'un tres-grand respect, ie croirois qu'un homme d'Angoulesme nous auoit voulu descrire Angoulement qui estoit Prince d'un Pays, dans lequel tu pouuois estre Secretaire de ses commandemens.

Tu as raison de te desfier *du peu de cognoissance de nos affaires*. Si tu les sçauois, comme faisoient

soient le Chancelier de Silleri, Mr de Villeroy, & le President Ianin, tu ne cornerois pas la guerre pour faire plaisir à celuy qui est en cette belle humeur de la mettre par tout. Il sçait que dans la tranquillité de la Paix, on verroit & on arresteroit ses desseins, qu'il veut cacher & aduan- cer dans les troubles; & il s'est imaginé, que les cris lamentables du pauvre peuple seront estou- fez par le bruiet des armes, qui feront vaquer toutes les charges desquelles il veut disposer, & les Gouuernemens qu'il veut auoir, en faisant mourir, ou rendant suspects ceux qui en sont pour- ueus.

Tu dicts que tu as *plus de courage que de force, & plus de zele que de science*. Ce que tu fais, ne vient ny du courage ny du zele; encore que ces deux choses sans prudence soient temerité & folie. Mais on peut dire avec verité, que tu as plus de vanité que de capacité, plus d'effronterie que de science, & plus de caquet que de raisons. Tu as comme le chardonneret vne iolie voix, avec des plumes de toutes couleurs, & rien plus: tu fais peu de besogne, & mauuaise, en beaucoup de
de

de temps : ta façon d'écrire lasse souvent la foiblesse de ton esprit : tu ferois plus de chemin, & plus seurement, si tu n'allois que le pas; mais n'allant qu'à balsades, il ne se faut pas estonner si tu es bien tost hors d'haleine.

Ce qui me faict bien esperer de ton amendement, est que tu recognois vne partie de tes fautes aussi tost que tu les a faictes; & qu'ayant rapporté toutes les pieces de ton ouvrage, tu as aperceu sa difformité, qui ne paroissoit pas tant deuant qu'elles fussent assemblées. Cela t'a obligé à faire vne Apologie dans l'Aduertissement au Lecteur, & dans les deux Lettres qui sont à la fin de ton Liure : ainsi tu te defens deuant que d'estre accusé. Il me semble que tu ferois mieux de changer ce qui est defectueux, que de l'excuser : & il seroit plus sagement faict, de supprimer des mauuais escrits, que d'en faire imprimer d'autres pour les soustenir. Sans faute tu te verras attaqué de beaucoup d'endroiets sur ton Traicté du Prince: il n'y a rien qui puisse resister que les louanges du Roy; encore te dira il ce qu'un bon Roy disoit de Dieu à ses amis flatteurs: *Il n'a pas besoin* Iob. 13.

H

de

de vostre mensonge : Et il y a tant de belles veritez à dire de luy, que c'est faire voir qu'on ne les cognoist pas de se servir de menteries. Que deuiendra ce fier Rodomont, si ce braue Oger ne luy sert de Second ? Il ne le fera point sur tout, apres que tu as offencé avec la Mere de ton Grand Roy les Meres de ta petite science, qui sont les Vniuersitez; & que tu as en mesme temps ietté de la boüe dans la source de la vie de ton Maistre, & sur la face de ceux qui ont esté tes Maistres. Ces imprudences sont les premieres peines de ton orgueil, & les marques les plus certaines que nous ayons de ton aueuglement. La fortune passera, la Nature demeurera; le mēsonge perira, la Verité triomphera; la prosperité sera affligée, l'affiction sera consolée; & le superbe s'esleuera, iusques à ce que Dieu soit exalté en l'abaissant. Balsac ne sera pas trompé, car il croïd bien que cela arriuera: il ne sera pas deshonoré, ne pouuant estre plus infame qu'il est; & il ne sera pas deschargé par l'impression de la feüille qu'il a retenu, & dans laquelle il a deffaiët tout ce qu'il a faiët pour le Cardinal de Richelieu. La plus douce penitence qu'on

qu'on te puisse ordonner, sera de t'obliger à corriger tes œuvres au lieu où elles ont esté faictes; de conuertir ta folitude volontaire en vn bannissement forcé, & de te condamner à estre trempé trois fois dans la Charante, comme on faisoit anciennement dans la Saone ceux qui auoient recité des mauuais escrits en l'assemblée des sçauans hommes, qui se faisoit tous les ans à Lyon. à Dieu.

F I N.



